

AQUA ET AQUOSA.

I. AQUA PURIFICATA.

Aqua communis simpliciter filtrando, vel coquendo prævie et dein filtrando per saccum densum cannabinum, pulvere carbonum probe repletum, purificata usui servetur.

AQUA DESTILLATA.

℞. Aquæ fontanæ (rivalis vel putealis) quantum placet.

Ex vasis vitreïs vel stanneis, aut stanno probe obductis, mundissimis igne moderato fiat destillatio, donec circiter duæ tertiæ partes destillaverint. Aqua sic obtenta aëri per aliquot dies exponatur, vel in apparatu proprio cum aëre probe agitata usui servetur.

II. AQUÆ MINERALES.

AQUA BARYTÆ.

℞. Barytæ unciam unam.

Aquæ destillatæ libram unam.

Misce et digere per decem horas agitata sæpius massa; dein cola et in vase clauso usui serva.

Usus præcipuus ad examinandas aquas minerales.

AQUAS CALCIS.

R. Calcis recenter ustæ libram semis.

Vasi figulino immitte et aquæ uncii quatuor asperge. Calx vase clauso incalescit et in pulverem delabitur; dein eidem affunde Aquæ libras duodecim.

Agitando calcem cum aqua permisce. Postquam subsedit calx, itera agitationem, idque fiat decies circiter, occluso semper vase ut liberior aëris accessus arceatur. Tandem cola aquam per chartam in infundibulo operto positam, et in lagenis probe clausis usui serva.

VIRTUS: Alcalina; antacida.

Usus internus: Morbi ex acido primarum viarum, morbi quidam cutanei; phthisis? hydrops? diabetes? Externus: Ulcera

crurum inveterata; Phlogosis-erythema,
præcipue ex ambustione aut punctura in-
sectorum.

AQUA MARINA ARTEFACTA.

℞. Aquæ libras quinquaginta.

Muriatis sodæ uncias decem.

———— magnesiae drachmas decem.

———— calcis uncias duas.

Sulfatis sodæ,

———— magnesiae, ana drachmas sex.

Misce.

Usus pro *balneis marinis artificialibus*,
frigidis vel calidis: Scrophula aliive
morbi systematis lymphatici; debilitas
systematis arteriosi.

AQUA MINERALIS ACIDULA.

Aquam SELTERANAM æmulans.

℞. Aquæ puræ libras quinquaginta.

Carbonatis calcis drachmas duas.

———— magnesiae unciam unam.

———— sodæ drachmas sex.

Muriatis sodæ unciam unam semis.

Trajice per solutionem in apparatu proprio

Gazis acidi carbonici pollices cubicos
909 ad 1,000.

AQUA MINERALIS ALCALESCENS.

Aquam CAROLINAM, BORSETANAM etc.
æmulans.

℞. Aquæ puræ libras duodecim.

Sodæ unciam unam semis.

Immitte in apparatus vitreum à doctore
Nooth inventum (vel alium quemcunque
huic scopo proprium) et gaz acidum carbo-
nicum, ex carbonate calcis mediante acido
muriatico elicatum, transire coge per solu-
tionem alcalinam, donec eodem supersatu-
rata sit. Aquam sic paratam in vasis probe
clausis usui serva.

Usus : Calculus viarum urinarum; po-
dagra; morbi ex metastasi lactea; morbi
ex acido primarum viarum orti.

AQUA MINERALIS CATHARTICA.

Aquam EPSOMENSEM, SEDLITZENSEM,
SEIDSCHÜTZENSEM etc. æmulans.

- ℞. Aquæ puræ libras quadraginta octo.
Sulfatis magnesiæ (vel Sulfatis sodæ)
uncias triginta sex.
Magnesiæ drachmas duas.
Misce.

VIRTUS : Cathartica ; deobstruens.

AQUA MINERALIS FERRATA.

Aquam SPADANAM, PYRMONTANAM etc.
æmulans.

- ℞. Aquæ puræ libras quinquaginta.
Carbonatis calcis drachmas quinque.
———— magnesiæ drachmas decem.
Oxydi ferri nigri drachmas duas.
Sulfatis magnesiæ drachmas sex.
Muriatis sodæ drachmam unam.
Trajice per solutionem in apparatu pro-
prio
Gazis acidi carbonici pollices cubicos
mille.
Misce.

AQUA MINERALIS SULFURATA.

Aquam AQUISGRANENSEM, BAREGIANAM etc. æmulans.

℞. Aquæ puræ libras quadraginta.

Carbonatis calcis drachmas quinque.

———— sodæ drachmas decem.

Muriatis sodæ drachmas septem.

Gazis acidæ carbonici,

—— hydrogenii sulfurati, ana pollices
cubicos 900 ad 1,000.

Aquæ in vase stanneo probe calefactæ addantur ingredientia; dein gaze acido carbonico æque ac gaze hydrogenio sulfurato, mediante apparatu proprio, probe imprægnetur.

VIRTUS : Diaphoretica; antacida; deobstruens.

USUS : Morbi cutis; myodynîa; arthrodynîa rheumatica vel arthritica; paralysis; morbi chronici rebelles.

AQUÆ DESTILLATÆ.

SYN. *Aquæ destillatæ simplices ; aquæ stillatitice ; aquæ aromatisatæ.*

Parantur destillando plantas vel plantarum partes varias cum aqua simplici vel cum aqua muriate sodæ imprægnata. Aqua sic obtenta sæpe etiam, ut principiis plantæ volatilibus ditior evadat, de novo cum planta recente destillatur, quæ operatio *Cohobatio* appellatur. Obtinentur etiam aquæ hæ eodem processu quo alcohol plantarum variarum methodo supra descripto obtinetur, præcipue si operatio destillationis fit ex alembico duplici fundo instructo, implendo, ad cavendum empyreuma, spatium intermedium aqua simplici, vel melius, ut gradus caloris augeatur, aqua muriate sodæ saturata; et continuando sic, postquam alcohol aromatisatum omne in excipulum transiit, destillationem aquæ.

Plantæ aut plantarum partes, ubi siccæ adhibentur, ante destillationem per viginti quatuor horas in aqua destillata macerari debent. Singulis harum aquarum libris adde

alcoholis ex eadem planta destillati unciam dimidiam vel integram, easdemque in vasis probe clausis usui serva.

Eodem modo ex tempore parari possunt aquæ aromatisatæ variæ addendo aquæ destillatæ alcohol ejusdem plantæ destillatum, aut oleum volatile ejusdem plantæ alcohole solutum.

AQUA AROMATICA COMPOSITA.

℞. Herbæ Salviæ officinalis uncias octo.

—— Rosmarini officinalis,

—— Menthæ piperitæ,

Florum Lavandula - spicæ ana uncias quatuor.

Seminis Anethum-Fœniculi,

Corticis Laurus-cassiæ ana uncias duas.

Concisis et contusis affunde

Alcoholis libras quatuor.

Aquæ quantum satis.

Macera per viginti quatuor horas; dein destillando elice libras duodecim.

VIRTUS: Stimulans; aromatica.

AQUA CERASORUM.

- R. Cerasorum nigrorum sylvestrium recentium una cum nucleis contusorum libras decem.

Aquæ quantum satis.

Destillando elice libras viginti.

Eodem modo paratur :

AQUA fructus RUBI IDÆI.

AQUA CHAMOMILLÆ.

- R. Florum Matricaria-Chamomillæ siccatorum libras duas.

Aquæ quantum satis.

Destillent libræ viginti.

Eodem modo paratur :

AQUA florum Pruni spinosæ.

————— Tiliæ Europææ.

————— corticis Laurus-Cinnamomi.

————— Laurus-Cassiae.

————— herbæ Hyssopi officinalis.

————— Dracocephali Canariensis.

AQUA herbæ Melissæ officinalis.

————— Menthæ piperitæ.

————— Menthæ pulegii.

————— Menthæ crispæ.

————— Menthæ viridis.

————— Menthæ cervinæ.

————— Rutæ graveolentis.

————— Salviæ officinalis.

—————seminum Apium-Petroselini.

Ex his præstat Aqua Dracocephali Canariensis loco aquæ Melissæ; et Aqua Menthæ cervinæ loco aquæ Pulegii.

AQUA FENICULI.

℞. Seminis Anethum-Fœniculi contusi libram unam.

Aquæ quantum satis.

Destillando eliciantur libræ viginti.

NB. Oleum volatile supernatans auferatur.

Eodem modo paratur :

AQUA seminum Pimpinella-Anisi.

ET AQUOSA.

211

AQUA baccarum Juniperi communis.

———— Myrtus-Pimentæ.

AQUA LAURO-CERASI.

℞. Foliorum recentium Prunus-Lauroce-
rasi libras duas.

Aquæ quantum satis.

Destillando e retorta vitrea eliciantur
libræ tres.

VIRTUS : Narcotica ; antispasmodica.

Usus : Carcinoma ; scirrhus ; physconia he-
patis ; phthisis ; dysuria.

Dosis : Guttæ triginta—quadraginta bis die.

AQUA ROSÆ.

℞. Petalorum Rosæ centifoliæ vel Damas-
cenæ recentium libras quatuor.

Muriatis sodæ libram unam.

Aquæ quantum satis.

Destillando eliciantur libræ viginti.

Eodem modo paratur :

AQUA florum et petalorum CITRUS-
AURANTII vulgo *Aqua Naphæ* dicta.